

Date – 12/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. November ni 5-a Sinlung Hills Council inthlan vawi 2-na lo awm tura chuh tum mi 50 te'n endikna an paltlang.
2. Mizoram Synod hnuaia Inkhawmpui lian ber dawttu Presbytery Inkhawmpuiaah Zirtawpni atanga rorel tan chu nimin khan chhunzawm a ni.
3. Mizoram Commercial Vehicle Union (MCVU)-in naktuk Thawhtanni atanga sumdawng lirthei zawng zawng dintir an tum an thulh rih laiin kawngpui chhe lutuk avanga tlan tum lo pawl 3 an awm.



SHC SCRUTINY

November ni 5-a Sinlung Hills Council inthlan vawi 2-na lo awm tura chuh tum mi 50 te'n endikna an paltlang.

Sinlung Hills Council-a bial 12 inthlanna awm tur chuh tumin mi 50-in an hming an pe lut a, Zirtawpni khan an hming pek luhte hi endik a ni a. Hming pe lut zawng zawng hian endikna an paltlang vek a. Thawhtanni chawhnu dar 3 thleng inhnudawhna hun hawn a ni.

He inthlan lo awm turah hian rorel lai ZPM leh Hmar People's Convention (HPC) tang dun chuan bial awm zawng zawng an chuh dawn a. An inremsiam danah chuan ZPM-in bial 8 an chuh ang a, HPC-in bial 4 an chuh ang. Congress pawhin bial zawng zawng an chuh a dawn a, MNF chuan HPC (Reformed) nen thawk dunin bial 12 an chuh ang.

Hetih lai hian MNF leh Congress party hminga chuh tum hming pe lut zingah independent anga chuh an awm bawk a. BJP-in bial 2, Khawlian leh Phuaibuang an chuh dawn a, a dang zawng chu independent a chuh an ni.

Sinlung Hills Council bial 12 zinga bial 6 hi Aizawl district huam chhunga awm a ni a, bial 4 chu Saitual district-ah awmin Kolasib district-ah bial 2 a awm bawk. Khawlian, Tingmun leh Saipum bialah te candidate 6 an awm a, Phuaibuang bialah candidate 5 an awm a. Suangpuilawn, New Vervek leh Saiphai bialah candidate 4 theuh awmin bial dang – Vanbawng, Ratu, Sakawrdai South, Sakawrdai North leh Zohmun bialah te chuan kil thumin an inchuh dawn a ni.

Inthlan lo awm turah hian vote nei mi 23,794 an awm a. Vote nei zinga 11,875 hi mipa an ni a, hmeichhe vote nei 11,914 an awm bawk.

Sinlung Hills Council hi July ni 5, 2018 atanga hman tan Sinlung Hills Council Act, 2018 dan tlawhchhana din a ni a. November ni 5, 2019 khan inthlanna hmasa ber buatsaih a ni.



PRESBYTERY

Mizoram Synod hnuaia Inkhawmpui lian ber dawttu Presbytery Inkhawmpui, Ningani atanga hman tanah Zirtawpni atanga rorel tan chu nimin khan chhunzawm a ni.

Presbytery hi 47 a awm chungin tunah hian Presbytery 41-ah inkhawmpui hi kalpui mek a ni a. Inkhawmpui tan ni, Ningani khan Nomination Committee, Finance Committee leh Sub - Pastoral Committee an thu a. Kohhran Upa thlan tharte Exam buatsaih a nih bakah zan inkhawmah Palai lawmna leh Pastor Bial Report ngaihthlak a ni. Zirtawpni leh Inrinni-ah Rorel Inkhawm a awm a. Presbytery thenkhat chu Inrinni chauha Rorel an awm bawk a, zan lamah vantlang Pathian biak Inkhawm buatsaih a ni.

Vawiin Pathianni chawhma inkhawmah Upa Nemngheh Inkhawm hun hman a ni ang a, chawhnu-ah Lalpa Zanriah Sakramen leh Upa thite sunna inkhawm a awm ang a, zanah Presbytery Moderator kalchhuakte'n Valedictory Sermon an sawi ang.

Synod Moderator Rev. R. Vanlalnghaka chuan Chhimchhak Presbytery inkhawmpui a hmanpui a, Synod Secretary (Sr.) Rev. P.B. Mankima'n Aizawl West-I Presbytery hmanpuiin Synod Secretary (Jr.) Upa Vanlalsawma Siakeng chuan Aizawl Central Presbytery a hmanpui bawk. Finance Officer Rev. P.C. Pachhunga'n Serlui Presbytery a hmanpui a, Statistician Rev. H. Lalthananga'n Hmarthlang Presbytery inkhawmpui a hmanpui. Sr. Executive Secretary Rev. C. Zoramawia'n Khawthlang Presbytery, Executive Secretary Rev. V.L. Luaia Hranleh-in Teirei Presbytery leh Executive Secretary Rev. Dr. K. Lallawmzuala'n Chhimphei Presbytery inkhawmpui te an hmanpui bawk a ni.

Zirtawpni khan Serchhip Kawnpui Kohhran Biak In-a Chhimchhak Presbytery moderator Rev Lalremruata kaihhruaia rorel thu pawm zingah bial leh Presbytery huapin HIV/AIDS dona kawnga tan lak ni se tih a tel a. Kohhran Upa thi vui dan ennawn ni se tih a nih bakah Presbytery inkhawmpui-ah mual inkhawm leh lenkhawm te neih leh tawh ni se tih chu Covid hrileng vanga tih loh mai a nih avangin a hranpa a pawm thar a ngai love, an ti thung.



STIR AMONG MCVU

Mizoram Commercial Vehicle Union (MCVU)-in naktuk Thawhtanni atanga sumdawng lirthei zawng zawng dintir an tum an thulh rih laiin kawngpui chhe lutuk avanga tlan tum lo pawl 3 an awm.

MCVU hian Chief Minister Pu Lalduhoma an hmuh hnu-ah kar leh Nilainia cabinet thukhawmin petrol leh diesel man sang tihhniam leh chungchang an ngaihtuah nawn leh dawn avang leh tihhniam ngei tura an ngaih avangin naktuk atanga sumdawng lirthei zawng zawng tlan lo tura thutlukna a siam chu an sut lailawk a.

Hetih lai hian Mizoram Truck Driver Association (MTDA), Mizoram tipper neitu leh khalhtu pawl leh eirawngbawlina gas phurtu Mizoram Indane Driver Welfare chuan lirthei dintir an lo tum tawh chu kaltlangpui an tum thu an puang. Hetianga nawrh an tum tlang chhan hi Aizawl leh Silchar inkar kawngpui dunga Sairang leh Durlui inkar kawng chhe zualpui, lirthei tluk hlauhawm khawpa khuar chhe laite siamthat a nih hma chuan Thawhtanni atangin tlan rih loh ni se, an ti a ni.



FUEL PANIC BUYING

Food, Civil Supplies & Consumer Affairs department chuan inchuh buai lo leh mahni mamawh tawk theuh chauh tuialhthei lei turin mipui an ngen.

Supply department hian thuchhuah siamin Mizoramah Petrol, Diesel leh LPG te hi mumal takin a rawn lût reng tih an sawi a. Fur ruahtui tam avanga kawngte'n duh thu a sam loh avangin kalkawngah a rawn phurtu motor-te an rawn thang rei deuh thin a. Chuti chung chuan Mizorama rawn phurh luh leh a thlengte chu a pangngai reng a ni, an ti.

Mipuie'n mahni hmasiala mamawh zat aia tam petrol leh diesel-te an chhekkhawl thin avangin mipui tam zawk tan harsatna an siam thin tih sawiin tul lovah Petrol pump-ah inchuh buaina a thlen phah a ni, an ti. Food, Civil Supplies & Consumer Affairs Department chuan Petrol, Diesel leh LPG te inchuh buai a awm loh na'n mahni mamawh chin chauh la turin mi tin a ngen a ni.



MZP

MZP chuan tunhnaia sorkar department hrang hranga officer pension tawh rawih nawn leh pension tawh mai tur ruai nawn tura file kal lai a awn nia hriain hei hi uluk taka chhui chiana pension tawh rawih nawn a nih loh na'n chak taka hmalak an tum.

Nimina General Headquarters Executive Committee thutkhawm vawi 636-naah MZP chuan Mizoram sawrkar hnuiaia hna thawkzingah pension tawh rawih nawn an awm fo thin chu tunhma atangin tha an tih loh thu an sawi fo thin tih an tarlang a. Pension tawh rawih nawn an nih avanga bang tura nawr pawh a lo nei zauh zauh tawh thin tih an sawi.

MZP chuan, sawrkar hnathawkte chu an hnathawh hun chhunga thahnemngai taka thawk turin ngen a. An pension tawh hnuah erawh chuan thalai hna zawng mekte kian tur leh officer pension tawh, thiltih theih fal bik avanga inrawih nawn ang chi a awm loh nan theihtawp chhuahin hma a la dawn a ni tih an sawi a ni.



KUKI-ZO COUNCIL

Nikuma Aizawla din, Manipur a Zofate insuihkhawmna pawl 'Zo United', ti a phuah 'Kuki-Zo Council' tia a hming thlak tak chuan Zirtawpni khan hruaitu an inthlang.

Puan tawh angin nikum September ni 7-a Central YMA committee room-a Manipur Zofa pawl hrang hrang aiawhte'n Mizoram NGO Coordination Committee uapna hnuiaia an din Zo United hi kum khat chuang a kal hnuah kar kal ta khan 'Kuki-Zo Council' tia hming thlak a ni a. Zirtawpnia Churachandpur-a hruaitu thlanna-ah Pu Henlianthang Thanglet chu Chairman atan thlan a ni a, Pu Thangzamang chu Secretary atana thlan niin Rev. Dr. GS Gangte chu Treasurer atan thlan a ni. Pu Khaikhohauh Gangte chu Information Secretary atana thlan a ni a, Pu Ch. Ajang Khongsai chu Chief of Governing Council atan thlan a ni bawk.

Kuki-Zo Council hi Manipur-a Zofa zawng zawng aiawh leh huapzo tura din a ni a. He pawlah hian hnam chi hrang hrang aiawh pawlte leh Inpui hrang hrangte'n aiawh an nei vek a. Inbiakna kawngah te, hnam pum huapa thutlukna siam kawngah te Manipur Zofate zawng zawng aiawhtu leh thuneitu sang ber a ni dawn a ni.

